

Bosna i Hercegovina
Federacija Bosne i Hercegovine
TUZLANSKI KANTON
Ministarstvo prostornog
uređenja i zaštite okolice

NACRT

Broj: 12/1-19-007205/25
Tuzla, april 2025.godine

Ministarstvo prostornog uređenja i zaštite okolice Tuzla, rješavajući po zahtjevu, "ŠESFARM" d.o.o. Gračanica od 21.02.2025. godine, kojim se traži izdavanje okolinske dozvole za objekat farme za uzgoj pilića na području Grada Gračanica, a na osnovu odredaba člana 82., 83. i 86. Zakona o zaštiti okoliša ("Službene novine Federacije BiH", broj: 15/21), odredbi Uredbe kojom se utvrđuju pogoni i postrojenja koja moraju imati okolinsku dozvolu ("Službene novine Tuzlanskog kantona" broj: 51/21 i 74/22), i člana 200. Zakona o upravnom postupku ("Službene novine Federacije Bosne i Hercegovine" broj: 2/98 48/99 i 61/22), **donosi:**

R J E Š E N J E **o okolinskoj dozvoli**

I

Nosiocu zahvata, "ŠESFARM" d.o.o. Gračanica, izdaje se okolinska dozvola za objekat farme za uzgoj pilića kapaciteta 36.000 mjesta na zemljištu označenom kao k.č. broj: 2592/2 KO Donja Lohinja, Grad Gračanica.

Pogoni i oprema za koje se izdaje okolinska dozvola

Objekat farme za tov pilića sastoji se od prostorije za tov pilića i komandne ploče za automatsko upravljanje farmom, kancelarijskog prostora i kotlovnice.

Objekat je dimenzija 90,00 x 12,50 m, P+1 (60,00 x 12,5 stari dio + 30x 12,5 m novi dio).

Pored objekta nalaze se dva silosa za smještaj hrane.

Opis izvora emisija i utjecaji koje će pogon/postrojenje imati na okoliš

Uticaj na zrak

Emisije zagađujućih materija u zrak se javljaju:

- radom kotla koji služi za zagrijavanje prostorija farme,
- prozračivanjem peradarnika pri čemu dolazi do emisija u zrak prašine, koja se sastoji od sitnih čestica hrane i paperja, kao i razgradnjom gnoja pri čemu dolazi do pojave neugodnih mirisa pogotovo u toku ljetnih mjeseci.

Uticaj na vode

Nastale otpadne vode mogu se podijeliti na sanitarno fekalne otpadne vode i tehnološke otpadne vode, zauljene oborinske vode i oborinske vode sa krovova.

Sanitarno fekalne otpadne vode nastaju prilikom održavanja higijenskih uslova rada na objektu, kao i u sanitarnim čvorovima unutar prostora.

Oborinske vode sa krovova objekata će se putem kišnih vertikalna ispustiti na okolni teren, dok se oborinske vode sa saobraćajnica prikupljaju sistemom oborinske kanalizacije i slivnika i odvede na separator ulja i masti.

Tehnološke otpadne vode nastaju prilikom čišćenja objekta za tov pilića.

Uticaj na tlo

Moguća direktna emisija u tlo je eventualno slučajno izlivanje ulja i naftnih derivata iz vozila za dopremu sirovina, dopremu i otpremu životinja, energenata za zagrijavanje koji se koriste na lokaciji.

Prostirka i đubrivo koji se prikupljaju nakon završenog turnusa ne smiju se odlagati direktno na zemljište, već je investitor u obavezi da izgradi vodonepropusni armirano-betonsku lagunu za privremeno odlaganje prostirke i đubriva.

II

Osnovne obaveze nosioca zahvata koje se trebaju ispuniti tokom izgradnje, rada i prestanka rada pogona i postrojenja:

1. Da ne ugrožava zdravlje ljudi, ostvaruje povoljno stanje flore i faune, ne dovede do gubitka staništa koji se nalaze na području uticaja postrojenja ili okoliša zbog emisija supstanci, buke, mirisa, vibracija ili toplote, saobraćaja ili od postrojenja.
2. Da proizvedu sve odgovarajuće preventivne mjere za sprečavanje zagađenja i ne prouzrokuju zagađenje iznad graničnih emisija.
3. Da izbjegava stvaranje otpada, njegovu količinu svodi na najmanju moguću mjeru, stvoreni otpad ponovo koristi, reciklira ili odlaže na način da se izbjegne i smanji negativan uticaj na okolinu.
4. Da se efikasno koriste energetske i prirodni resursi.
5. Da se poduzmu mjere za sprečavanje nesreća i ograničavanje njihovih posljedica.
6. Da se poduzmu mjere nakon prestanka rada postrojenja za izbjegavanje rizika od zagađenja i za povrat lokacije na kojoj se nalazi postrojenje uz zakonom propisano stanje okoliša.

Mjere za zaštitu zraka, tla, voda, biljnog i životinjskog svijeta:

1. zrak mora biti zaštićen od opterećenja bilo kojih vještačkih uticaja koji se vrše na zrak ili na druge komponente okoliša putem transmisija radioaktivnih, tečnih, gasovitih ili čvrstih materija ukoliko postoji opasnost da će štetno uticati na kvalitet zraka ili se štetno odraziti na ljudsko zdravlje.
2. Putem ventilacionog sistema na objektu peradarnika vršiti odvođenje zagađujućih materija koje nastaju od hrane i paperja, kao i razgradnje gnoja i čišćenja farme,
3. Nakon instalacije kotla za zagrijavanje prostorija farme, vršiti periodični monitoring emisija dimnih plinova na kotlu.
4. Zaštita voda obuhvata očuvanje površinskih, podzemnih, prijelaznih i priobalnih voda, zaliha vode, regulisanje kvaliteta i kvantiteta vode, zaštitu riječnih korita, vodnog dobra, vodnih i za vodu vezanih ekosistema, obalnih područja kopnenih voda i akvafera.

5. Zabranjeno je otpad iz planiranog objekta ili bilo kakav drugi materijal unositi u vode, javno vodno dobro, kao i odlagati na način i na područjima gdje postoji mogućnost zagađivanja podzemnih i površinskih voda.
6. Na površini ili ispod površine zemlje mogu se obavljati takve vrste djelatnosti i odlagati supstance koje ne zagađuju ili ne oštećuju kvantitet iznad propisanih graničnih vrijednosti, kvalitet, materijalne procese tla i komponente okoliša.

Mjere za upravljanje otpadom koji proizvodi pogon i postrojenje:

1. Nosilac zahvata dužan je poduzeti odgovarajuće mjere upravljanja otpadom i druge mjere zbrinjavanja otpada koje su propisane propisom o upravljanju otpadom u Federaciji BiH, te osigurati osnovne mjere u cilju sprečavanja stvaranja otpada, recikliranja i tretiranja otpada za ponovnu upotrebu, kao i moguće korištenje otpada za stvaranje energije te sigurno odlaganje.
2. Nosilac zahvata je dužan pridržavati se mjera za upravljanje otpadom iz Plana za upravljanje otpadom, a donesen je na osnovu člana 19. i 20. Zakona o upravljanju otpadom ("Službene novine FBiH" broj: 33/03 i 72/09).
Nosilac zahvata je obavezan odrediti lice odgovorno za poslove upravljanja otpadom.
3. Zabranjeno je napuštati, gomilati, odlagati ili tretirati otpad bez nadzora. Zabranjeno je mješati različite vrste otpada osim ako se tako omogućava povrat sirovina i/ili odlaganje.
4. Komunalni otpad koji se proizvodi predavati nadležnom komunalnom preduzeću.

Mjere zaštite od buke i vibracija:

1. Zaštita od buke i vibracija u okolišu obuhvata zaštitu od svih vrsta vještački proizvedenih emisija koje izazivaju opterećenje nepoželjnom, neprijatno bukom i vibracijama, koje mogu ugroziti zdravlje ili na njega štetno uticati.
2. Izvori buke ne smiju izazivati buku koja prelazi nivo utvrđene ovim Zakonom.

Mjere vezane za uvjete rada u vanrednim situacijama:

1. U slučaju kvara smanjuje se ili prekida rad dok se ne steknu uvjeti za normalan rad. U tom slučaju izvor emisije ne može ni pod kojim uvjetima nastaviti rad duže od osam sati bez prekida, a ukupno godišnje trajanje rada u takvim uvjetima ne može biti duže od 96 sati.
2. Nadležno ministarstvo mora biti obavješteno o bilo kakvoj promjeni u projektu, planu ili radu nekog izvora emisije. U slučaju manjih promjena, nadležno ministarstvo mora biti obavješteno o pririodi promjene i njenim uticajima na emisiju zagađujućih materija u zrak u roku od sedam dana od dana nastanka promjene.
Nosilac zahvata je dužan da osigura adekvatno održavanje pogona i redovnu kontrolu rada tehničkih uređaja. U slučaju nesreća koje vode prekoračenju graničnih vrijednosti emisija operator je dužan odmah preduzeti sanacione mjere u cilju ponovnog uspostavljanja usklađenosti sa propisima.

Sistem praćenja emisija uz određivanje metodologije i učestalosti mjerenja:

1. U obavezi ste da dostavljate podatke neophodne za vođenje i održavanje registra o postrojenjima i zagađivanjima i prijenosu zagađujućih materija, na način kojim je propisan pravilnikom o registru zagađivača i zagađenjima okoliša ("Službene novine FBiH" broj: 11/23),

2. Ukoliko nosilac zahvata ne unosi podatke u elektronski registar o postrojenjima i zagađenjima po važećoj okolinskoj dozvoli ista prestaje da važi u skladu sa članom 97. Stav (1) tačka h) Zakona o zaštiti okoliša (“Službene novine Federacije BiH”, broj: 15/21).
3. Nosilac zahvata u obavezi je vršiti periodična mjerenja emisija u zrak jednom godišnje od ovlaštene institucije, a u skladu sa Pravilnikom o monitoring emisija zagađujućih materija u zrak (“Službene novine Federacije BiH”, broj:9/14 i 97/17).
4. Nosilac zahvata u obavezi je vršiti praćenje emisija u vode u skladu sa važećim vodnim aktom.

Mjere sanacije nakon prestanka rada pogona:

1. Ukoliko pogon ili postrojenje koje posjeduje okolinsku dozvolu, prestane sa radom, nosilac zahvata je dužan da o tome obavjesti nadležno Ministarstvo u pisanoj formi.
2. U slučaju prestanka rada pogona, potrebno je da nosilac zahvata podnese zahtjev za izdavanje okolinske dozvole za uklanjanje ili prestanak rada iste.

III

Okolinska dozvola se izdaje na određeno vrijeme sa rokom važenja od pet godina. Prije isteka važenja ove okolinske dozvole nosilac zahvata je dužan ovom Ministarstvu podnijeti zahtjev za obnovu okolinske dozvole 90 dana prije isteka važenja prethodne okolinske dozvole.

Obrazloženje

Podnosilac zahtjeva, “ŠESFARM” d.o.o. Gračanica obratio se ovom Ministarstvu sa zahtjevom broj:12/1-19-007205/25 od 21.02.2025. godine kojim se traži izdavanje okolinske dozvole za novi objekat farme za uzgoj pilića.

Uz zahtjev je dostavljena slijedeća dokumentacija:

1. Plan upravljanja otpadom,
2. Rješenje o vodnoj dozvoli broj: 04/1-13-21-25071/24 od 09.12.2024. god. izdato od Ministarstva poljoprivrede, šumarstva i vodoprivrede Tuzlanskog kantona,
3. Rješenje o vodnoj dozvoli broj: UP-I/21-3-40-403-4/24 od 12.09.2024. god. izdato od “Agencije za vodno područje rijeke Save” Sarajevo,
4. Kopija posjedovnog lista broj: 2391 KO Donje Lohinja-Pribava, Grad Gračanica,
5. Kopija zemljišnoknjižnog izvodka broj:2535 KO Donje Lohinja-Pribava, Grad Gračanica,
6. Kopija katastarskog plana broj: 8 KO Donja Lohinja-Pribava, Grad Gračanica
7. Izvještaj o mjerenju emisije zagađujućih materija u zrak od 20.05.2024.god. urađen od strane TQM d.o.o. Lukavac,
8. Ugovor o crpljenju i prečišćavanju sanitarno fekalnih otpadnih voda broj: 08-495-2/25 zaključen sa JP vodovod i kanalizacija d.d. “Srebrenik”,
9. Ugovor o zbrinjavanju uginulih životinja, animalnog i sličnog otpada broj:01-01-128/25 zaključen sa JKP “ČISTO” d.o.o. Doboj Istok,
10. Administrativna taksa.

Rješavajući po ovom zahtjevu, u provedenom upravnom postupku u kojem je strankama data mogućnost da se izjasne o svim okolnostima i činjenicama relevantnim za odlučivanje u konkretnom slučaju (u skladu sa članom 141. Zakona o upravnom postupku), te nakon utvrđivanja nadležnosti u skladu sa Uredbom kojom se utvrđuju pogoni i postrojenja koja moraju imati okolinsku dozvolu (“Službene novine FBiH”, broj: 51/21 i 74/22), kojom je definisano da pogoni za intenzivan uzgoj peradi od 20.000 do 60.000 pripadaju pogonima za koje Ministarstvo prostornog uređenja i zaštite okolice TK obavezno provodi postupak izdavanja okolinske dozvole i na osnovu pregledane tehničke i druge dokumentacije, ovo Ministarstvo je utvrdilo uvjete navedene u dispozitivu.

Ministarstvo prostornog uređenja i zaštite okolice je, shodno članu 88. Zakona o zaštiti okoliša (“Službene novine FBiH”, broj:15/21), u saradnji sa “ŠESFARM” d.o.o. Gračanica osiguralo učešće javnosti u postupku izdavanja okolinske dozvole, na način da je poziv za učešće javnosti objavljen u dnevnim novinama “Oslobođenje” 08.04.2025.godine , i na internet stranici www.vladatk.gov.ba.

Nosilac zahtjeva je, na osnovu TAR: broj 50 Zakona o kantonalnim administrativnim taksama i tarifi kantonalnih administrativnih taksi (“Službene novine Tuzlanskog kantona”, broj: 6/12,15/13 i 10/18) platio taksu u iznosu od 200,00 (dvijestotine) KM, a izvještaj o uplati je u spisu ovog predmeta.

Pouka o pravnom lijeku

Protiv ovog Rješenja je dopuštena žalba Federalnom ministarstvu okoliša i turizma u Sarajevu u roku od 15 dana od dana prijema Rješenja.

Žalba se podnosi putem ovog Ministarstva, a taksira se sa 10 KM kantonalne administrativne takse na Tuzlanski kanton kod NLB banke na račun broj: 132-100-02560000-80, sa naznakom za vrstu prihoda broj: 722121.

MINISTAR

Anela Ajšić, BA ing.grad.

Dostaviti:

- “ŠESFARM” doo Gračanica
Ahmetaši bb, D.Lohinja, Gračanica
- Inspektor zaštitе okoliše-kantonalna uprava za inspeksijske poslove,
- Grad Gračanica, Služba za prostorno uređenje, geodetske i imovinsko-pravne poslove,
- Evidenciji i
- Arhivi.